

At medium tenere locum Germania, Lechi
Cum regnis latè campestribus, & ditiones
Gallorum, quos a Pyrenes montibus illinc,
Alpibus hinc clausos tellus alit alma feraxque.

Demùm quod superest, magnum mare, circuit omnem
Quod terram, Oceani vocitamus nomine; at illud
Pro regione loci varia, quem perluit undis,
Nomina sortitum est pariter variantia; quippè
Æquor Atlantæum tibi Mauri à vertice montis
Nomen habet, quoniam radices montis ad ejus
Franguntur fluctus: Americæ ad littora Iberis
Longè a littoribus pelagi hic extenditur æstus.
Æquor Hyperboreum, contràque Australe vocamus;
Terrarum quod eas perfundit fluctibus oras.
At mare Pacificum jacet inter litus Eoum,
Occiduasque plagas Americæ: æstumque vocamus
Præterea Medium, libycas qui volvit arenas,
Europæque, Asiæque allabens exedit oras.
Deindè quid Hyrcani, Rubrique tibi æquora ponti,
Euxinum, Adriacumque, minoraque nomina dicam?
Quid freta, Bosphoriarum fauces, syrtesque, sinusque
Commemorem? doctis hæc tutemet omnia quibus
Discere de Tabulis. Sine me nunc otia fessum
Captare, atque istas paulùm dimittere Musas.

Hic Patriæ me casus & horrida fata meorum,
Quæque hinc quondam uno pariter cecidere sub ictu
Millia multa, movent, animoque horrescere cogunt;
Prorsus & oblitum causarum excedere certos
Carminis impellunt fines, ultròque dolori
Indulgere meo paulùm, cinerique meorum;
Dum, pueris toties quæ nostri cumque solebant
Cum lacrymis cum singultu memorare Parentes
Quondam visa, libens repeto, atque audita revolve.
Cernitis everfas, dicebant, undique moles,
O Pueri, disjecta solo, congestaque passim

Sa-